

COLUMNA

Cancel Culture e Cultura da Chanzl(i)a

ROMAN CAVIEZEL

Jau na chapesch betg las caneras ch'ins fa ozendi cunter l'uschenumnada cancel culture. Schizunt en la Südostschweiz. Na, la stgatschada dal paradis somedial d'in prominent columnist virolosceptic è in auter problem. Definitiv. Quai va per nus sut offerta d'ina nova schanza davart da la direcziun. En in auter lieu halt, en num da Dieu.

Buccas nauschas pretendan che la cancel culture saja criva censura e nagut auter ch'in pal da la vargugna. Ma il cuntrari è il cas. La cancel culture è ina vaira cultura, e trasatras morala. Insatgi sto bain dir a la gliעד tge ch'è bun u nausch. U n'è ina pictura – er ina da Picasso – cun si in tgil niv da femnas forsa betg ina blutta discriminaziun per la schlattaina feminina? Vesais? E precis quai èsi da denunziar e regular en in stadi liberal. Exact tuttina sco l'adiever da plets sco negher u morin per persunas da color. U sco pussy per ina dunna. – Da l'autra vart, stgisai, ma in morin era halt schon insatge auter ch'in chau da tschigulatta! Be d'udir il pled – da vesair l'objet du



désir gnanc da discurrer – fascheva gia vegnir la spida en bucca! In bitsch sin distanza. Auter che quest chau da tschigulatta, plat e vulgar! Gea, igl è mintgant schon da vegnir vegan cun quellas novas modas! Ma pazienza, i va gea qua per ina buna chaussa.

Dal reminent, nus n'avain lura per cas betg duvrà ils Americans e lur innovaziuns marschas per vegnir a frida cun il problem da bun e nausch. En tschientaners da paschaivla e fritgaivla vita en cuminanza avain nus sviluppa, per uschè da dir ante litteram, ina gnocca varianza alpina da la cancel culture: la cultura da chanzla! Tgi na sa regorda betg dals illusters temps da la guerra

sonnga da prers e plevons per spendrar las olmas dals povers cristifidaivels. Tge allegher bumbardament moral e politic giu da la chanzla! Onns a la lunga e cun effect absolutamain segir. Ma insacura è vegnì «In segl in pop», «Malàm-mortàm-pumfate», las Lircas analas etc. e... nus avain stuì emprender da patratgar sez. Adia cultura da chanzla!

Ma i dovra pauc e hop èn ils vegls reflex puspè qua. Per fortuna, navaira? U essas vus forsa cunter l'intervenziun resoluta dal chanzlist da Scuol che ha tschentà giu curaschusamain ils filmins pornografics sin il monitor per infurmaziuns turisticas? El ha tuttina spenderà da donn psichics permanents tar numerus passants e passantas. Grazia fitgun, sar Andri.

La vischnanca spera uss ch'ils delinquents manipuladers na sajan betg da tschertgar en ravugls turistics. Tenor ella na dovria l'Engiadina Bassa betg dapli reclama, ils hotels sajan gia plains fin sisum per vi da la pandemia.

Roman Caviezel è stà scolast gimnasial.